

ARMADA SERBIARRAK EMANDAKO HIRU ULTIMATUMEI ENTZUNGOR EGIN ZIEN ATZO UCK-K

Kosovoko gerrillak trukea eskatu du gatibu serbiarrak askatzeko

■ Abenduan atxilotutako gerrillariak aska ditzaten eskatu dute UCK-ko indarrek.

■ Bahiketa lekuaren inguruan serbiarrak kontraerasoari ekiteko prestatu dira

■ OSCEko arduradunek Kosovoko gerrillaren jarrera arduragabea salatu dute.

Agentziak / **Pristina**

KOSOVOREN ASKAPENERAKO ARMADA (UCK) gerrillak herenegun armada serbiarreko zortzi soldadu gatibu hartu zituenetik, Balkanetako inguru hartan berriz ere gori dago giroa.

Armada serbiarrak mehatxu gogorra egi zien gerrillari bahuatutakoak aska zitzaizten exijitzeko, eta ohartarazi agindutakoa bete ezean eraso gogorra egingo zietela. Egunean zehar hiru ultimatum ere eman zizkieten, gauerdirako bata, goizerako bestea eta arratsaldeko lauretarako hirugarrena. Baina ultimatum horiei guztiei entzungor egin zieten UCK-koek, eta bezperan preso hartu zituzten zazpi soldaduak eta ofizial serbiarra askatzeko trukea eskatu zuten. Kosovoko Informazio Zentroak (gerrillaren aldekoa) atzo arratsaldean zabalduak informazioaren arabera, serbiarrak askatuko dituzte UCK-ko indarrek, baldin eta serbiarrak joan den abenduan Albaniako mugan izandako borroketan preso hartutakoak askatzen badituzte.

Bahiketa gertatu zen lekuaren inguruetan -Kosovska Mitrovica, Pristina hiriburutik 40 bat kilometro iparraldera- armada serbiarrak armamentu pilaketa handia egin zuen. Goizean iragarri zuen bahituak askatzeko operazioa jarri zuela martxan, baina iluntzera bitartean erasorik ez zuten egin. Itxura denez, OSCEko misioko kideek egun osoan negoziatu zuten agintari militar serbiarrekin erasoari ekin diezaioten eragozte aldera.



LOUISA GOULAMAKI

Kosovoko gerrillako bi kide, serbiarren kontraerasoari erantzuteko prest.

Gerra kriminala hil dute SFOReko indarrek

Agentziak / **Sarajevo**

DRAGAN GAGOVIC Bosnia-ko gerran krimenak egiteaz akusatutako serbiarra hil zen atzo inguru hartan diren nazioarteko indarrek (SFOR-eko) soldaduek egin dako tiroen ondorioz. Javier Solana NATOKo idazkari nagusiak atzo arratsaldean jakinarazi zuenez, Foca izeneko herritik gertu jazo zen gertakaria, nazioarteko

indarrak gerra kriminala atxilotzera zihoazenean. Bertsio horren arabera, Gagovic bera atxilotzera zihoazela jabetu eta autoarekin soldaduak harrapatzen saiatu zen. Solanak atzo esan zuen «euren defentsan» egin behar izan zutela tiro SFOR-eko indarrek Gagovicen aurka.

Gerra kriminala zaurituta geratu zen, eta berehalako-

an eraman zuten ospitale batera. Hara iritsi orduko hil zen baina.

Gagovic Hagako Gerra Krimenen Nazioarteko Epaitegiak du akusatua Bosnia-ko gerra garaian emakumeen detentzio esparru batean egindako delituengatik. NATOren arabera, tribunalaren aurrera eramateko atxilotzeko asmoa zuten atzoko opeazioan.

OSCEk gerrilla salatu du

Baina OSCEkoak bi aldetara negoziatzen aritu ziren, egun osoz baita ere, gatibu hartutakoak aska zitzaizten

lortzeko. Bezperan, Kosovoko gerrillako arduradunek bahituak askatuko zituztela agindu zieten, antza, OSCEkoei, baina Europako Segurtasun eta Kooperazioko Erakunde-

koek azpimarratu zuten UCK-koek emandako hitza jan egin zutela. OSCEko buruen arabera, gerrillak arduragabekiaz jokatu du eta hautsi egin du su-etena.

Abioneta batean zihoazen lau lagun hil dira Gironan istripuz

■ Hiriburuko aireportuan lur hartzera zihoala erori zen hegazkina

Agentziak / **Iruñea**

GIRONA hiriko aireportuan lur hartzera zihoala istripu larria izan zuen atzo eguerdian abioneta batek. Lurraren kontra jo zuen, eta kolpe handiaren ondorioz barruan zihoazen lau lagunak -bi emakume eta bi gizonezko- instantean hil ziren. Olot herrikoak ziren guztiak.

Atzo iluntzean artean argitzeke zegoen istripua zerk eragin zuen. Ikerketaren inguruko iturriek jakinarazi zutenez, baina, litekeena da behar baino abiadura gehiago galtzeak eragin izana ezbeharra. Izan ere, istripua gertatu aurretik abionetako gidariak eskatua zuen lurreratzeko baimena, eta kontrol dorrearekin izandako hartu-emanen ez zuen inolako matxuraren berri eman.

Atzoko gertakariaren ostean, jada hamar lagun dira abioneta istripuetan Katalunian hil diren pertsonak. Istripu horietan, gainera, beste bost lagun zauritu dira.

Bost lagun hil dira auto istripu batean Noirmoutier uharterako zubian

Allande Sokarros / **Baiona**

NOIRMOUTIEREKO uhartertea (Vendée) eta kontinentea lotzen dituen zubian gertatutako auto istripu batean, ibilgailu berean zihoazen 5 lagun hil ziren, ostiraletik larunbaterako gauean.

Jandarmeriak atzo emandako argibideen arabera, bost gazte barruan zeuzkan autoa bidetik irten zen eta hamar metro beherago erori lur gainera. Ibilgailuak berehala su hartu zuen, eta barnean zeuden bost lagunek ez zuten ahalik izan kanporatzeko.

Urte berriko lehen bide istripu larrienatarik bat da hau, eta gogorarazi behar da joan den urte amaieran azken urteotako larriena gertatu zela, hil eta zaurituen kopuruari dagokionez.